

SESSIONE UNIVERSITARIE D'ESTATE  
(18-30 di luglio 1983)

---

In Corsica, più ch'è in altrò, l'Università hà vucazione à apresi à u fora, à riceve tutti quelli interessati da e so attività, è à prumove iniziative di primura è di valore, atte à accresce a so nomina è a so frequentazione. U periodu di l'estate pare assai comudu da mette à dispusizione di un publicu largu e strutture è e capacità di accoglienza di l'università : tandu u scontru hè più faciule trà ghjente nativa o abitatocia, stantinanti corsi è furesteri. Un' hè un peccatu di immobilizà per parechji mesi un urdignu furmativu è educativu cusì capace, tantu più chì a inturnianza di l'università, Corti è i so cuntorni, offre una scelta diviziosa d'attività ?

Una parte impurtantissima di u patrimoni corsu - ma quante volte si sarà detta ? - hè a so cultura. Questa, ci vole ch'ella partecipeghji, cù a so forza inventiva sputica, à u sviluppu generale di a Corsica, chì tene in ella a capacità di ammaestrallu, è di adattallu à u locu è à a ghjente, senza rompe nè snaturà a so inturnianza è i modi di campà è di pensà.

Identificassi pienamente à a cultura corsa hè un'opera chì v'è ubligata per mezu di a lingua corsa. Di questa qui, u pesu è a influenza sò di primura oghje : da falli pusitivi in tuttu ci tocca à migliorà u statutu di a lingua chì li abbisognanu forza è dignità. Certe azzione setturiale di sparghjera, di attualizzazione è di riabilitazione sò state principiade digià, siasi in l'ambiente associativu siasi in l'organismi publichi. L'Università, per via di a so missione educativa è di e so garanzie tecniche è scientifiche, pò avè una parte di prima forza in issa direzione, allargandu a strada fatta è multiplicandu i risultati. L'azione di furmazione ch'ella pò mette in ballu si devenu stabilisce segundu una programmazione razionale, è pensata fendu casu à risponde à i bisogni veri di a dumanda.

Eccu l'idee chì eranu state ritenute quand'ellu si trattò di dà vita è forma, à e Sessione Universitarie d'estate 1983. Fù cunsiderata a cunniscenza di a lingua, a pratica di u parlà è cusì i gruppi funu costituiti segundu i livelli. L'idea maestra era chì accessu veru ùn si ne pò avè à a cultura, s'ellu ùn si dà cura à a lingua. A' nisun mumentu ùn si fece spiccanza trà lingua è cultura.

E' puru, al di là di l'azione di furmazione in lingua corsa, si volse favorizà u linguaghju in generale, cù a so putenza sana di spressione, di cumunicazione è di creazione. Locu duve elle si annodanu è si svolgenu e primure è e quistione di a sucetà corsa, a **parolla** corsa fù u strumentu è l'ogettu di issi studii.

Possinu l'altre azzione da vene ghjuvassi di issa prima sperienza, da migliorà ciò chì puderà esse miglioratu. Ma ch'elle tenghinu u spiritu maestru di e scorse sessione 1983 : travagliu è armonia, puru s'elli li toccanu listessi suleoni !

Ghjacumu THIERS  
Rispunsevule pedagogicu

Ghjacumu BRIGHELLI  
Presidente di l'Università  
Pasquale Paoli